



SAOPĆENJE ZA JAVNOST

8. maj 2023.

Potvrđena optužnica za razbojništvo Uz prijetnju nožem od radnice oduzeo novac

Tužilaštvo Brčko distrikta BiH podiglo je optužnicu protiv Bobana Nikolića (47)* iz Mladenovca, u Republici Srbiji, zbog sumnje da je prije tri godine u jednom trgovinskom objektu u brčanskom naselju Dizdaruša, uz prijetnje nožem radnici, počinio razbojništvo.

Optužnicom potvrđenom pred Osnovnim sudom u Brčkom, Nikolić je optužen da je 20. januara 2020. godine, u ulici Zaima Mušanovića, upotrebom sile prema radnici trgovinske radnje *Eldi-Sabina* oduzeo dnevni pazar u iznosu od oko hiljadu KM. Njemu se stavlja na teret da je, nakon što je prethodno više puta tu dolazio u kupovinu, u večernjim satima 20. januara, u namjeri pribavljanja protivpravne imovinske koristi, ušao u navedeni trgovinski objekat. On je zatim, kako se navodi u optužnici, prišao iza pulta i uhvativši radnicu A. D. za kosu stavio joj nož pod vrat rekavši joj „Daj pare!“. Usljed upućene prijetnje nožem i bojazni za vlastiti život, A. D. mu je rekla da sam uzme pare iz kase, jer je otključana. Pošto je iz kase oduzeo dnevni pazar u iznosu od oko hiljadu KM, Nikolić je pri izlasku iz objekta zaprijetio oštećenoj da će je ubiti, ukoliko izađe za njim. Optuženi je upotrebom sile i prijetnjom da će direktno napasti na život i tijelo nekog lica za sebe pribavio protivpravnu imovinsku korist u iznosu od oko 1.005,00 KM, za koji iznos je oštetio vlasnicu trgovinskog objekta - zaključuje se u optužnici za krivično djelo Razbojništvo (iz člana 283 stav (2) Krivičnog zakona Brčko distrikta BiH).

Iako je u intenzivnoj saradnji s Policijom Brčko distrikta BiH, krivično djelo brzo rasvijetljeno i počinilac odmah identificiran, Nikolić je i pored raspisane potrage, dugo bio nedostupan organima gonjenja distrikta Brčko. Kao državljanin Republike Srbije, koji je oko tri mjeseca prije izvršenja razbojništva imao neprijavljen boravak u Brčkom, on se po izvršenju krivičnog djela vratio u Mladenovac. Kako po zahtjevima bh. pravosudnih organa niti tamo nije pronađen, za njim je raspisana međunarodna potjernica, koja je 31. marta ove godine rezultirala njegovim hapšenjem i sprovođenjem brčanskom pravosuđu. Tužilaštvo Distrikta ga je odmah ispitalo u svojstvu osumnjičenog, nakon čega je, usljed opasnosti od bjekstva, Osnovnom sudu predložilo određivanja pritvora prema njemu. Tužilački prijedlog je prihvaćen, pa je Nikoliću određen pritvor u trajanju od jednog mjeseca. U međuvremenu, Tužilaštvo je okončalo istragu i protiv njega podiglo optužnicu kojom je, radi uspješnog vođenja krivičnog postupka, tražilo produženje pritvora Nikoliću. Pošto je u cijelosti potvrdio optužnicu, Osnovni sud produžio je pritvor optuženom za dva mjeseca, ocijenivši da i dalje postoje razlozi zbog kojih mu je pritvor prvobitno bio određen.

*Preduzimanje radnji krivičnog gonjenja prema određenom licu ne znači da je to lice zaista i odgovorno za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

**GLAVNI TUŽILAC
ZEKERIJA MUJKANović**